

四庫全書

史部

# 欽定四庫全書

史部

世宗憲皇帝上諭內閣卷一百

三十四至  
四十五

詳校官左都御史李綬

編修<sub>臣</sub>袁謙覆勅

總校官原任中允<sub>臣</sub>王燕緒

校對官原任典簿<sub>臣</sub>郭祚熾

謄錄監生<sub>臣</sub>王藻

欽定四庫全書

世宗憲皇帝上諭內閣卷一百三十四

雍正十一年八月

上諭九道

初一日奉

上諭上年江南松江地方潮水泛溢為災聞附近各鹽場內惟南匯縣之下砂各場奉賢縣之青村場被災稍重竈丁未免艱窘朕心實為軫念查下砂頭場二三場及

青村場有本年額課銀兩又有歷年舊欠銀兩若令此時照例徵收竈丁難於輸納著將本年額課緩至十月秋收後開徵其歷年舊欠之項分作三年帶徵以紓竈力可即傳諭浙江總督程元章知之

初六日奉

上諭據山東巡撫岳濬奏報東省解司耗羨從前因公動用條款紛繁多有浮濫之弊自雍正六年經前任督臣田文鏡逐一查核應補應銷分別清楚此後凡有動用

皆係地方應辦之項並無浮濫茲據布政使鄭禪寶報稱歷年耗羨銀兩現存庫七十五萬四千兩有零等語從前據孫國璽奏報豫省存庫銀七十萬有零朕已降旨將豫省本年地丁錢糧蠲免四十萬兩以加惠通省百姓今東省亦應一體加恩著將雍正十一年地丁錢糧照豫省之例蠲免四十萬兩即以存貯之耗羨照數撥補還項該省督撫務飭有司實力奉行俾閭閻均霑實惠倘有不肖官吏從中作弊私徵侵蝕者一經發覺

定行從重治罪

初七日領侍衛內大臣等奏親軍係近

御處當差之人嗣後不准挑取前鋒奉

上諭親軍雖係近御處當差之人然前鋒尤為緊要親軍俱係由佐領內視其漢仗好者挑取之人若將舊人挑為前鋒則致誤事嗣後親軍內未滿十年者准令挑取前鋒其過十年者毋令挑取前鋒將此永著為例

初十日奉

上諭據甘肅巡撫許容奏稱雍正十一年甘肅所屬應徵地丁銀二十七萬九千三百餘兩奉特旨全行蠲免以豐收之歲邀格外之恩閩省歡呼籲請代謝但臣查雍正十年甘省蒙恩蠲免所有民間已完銀十四萬六千三百七十四兩准抵今年正賦今年未奉恩旨以前又有已完銀三萬六千三十九兩合計共已完銀一十八萬二千四百一十四兩零此外更有續完亦未可定再查甘省有新經入額徵解錢糧一千一百餘兩尚未報

部相應一併奏聞等語朕思加惠甘肅所屬民人是以將本年額賦再行蠲免其上年及今年春夏間已完之項著該督撫董率有司詳細確查記明檔冊准抵甲寅年應徵正課至新經入額之錢糧一千一百餘兩亦著一體蠲免

十二日奉

上諭各省營伍必須武職大員平時親行查察庶可以除怠惰廢弛之弊提督一官節制全省統轄之地甚遠難



以親身遍歷至於總兵分轄地方道理不甚遼濶巡察尚易  
周遍嗣後各鎮臣有應行巡察之處著先期具摺奏聞請旨  
候朕批示遵行不必拘定期限免各營預備供應至滋擾  
累儻有絲毫苛累所屬弁兵者經朕察出定行從重議處

十九日奉

上諭直隸河渠水利關係國計民生朕留意多年悉心經理  
開濬河道修築堤工務令宣洩有資閭閻獲福又特設正  
副總河董率其事以專責成因王朝恩久歷外任且受朕

深恩諒能殫心竭力以副任使是以用為總河昇以畿輔  
河工之重寄乃聞王朝恩自到任以來性好安逸不耐煩  
勞僅於運河一路坐船勘驗工程其他各處從未親歷於  
河道形勢全不了然以致緊要之處堤岸殘缺水道壅淤  
平時漫無覺察今夏雨水雖多旋即晴霽並非久陰積滂  
可比而薊運還鄉等河及河間天津之運道併順德廣平  
大名之百泉滏陽漳河等處遂至決口漫溢傷害田廬居  
民罹於水患又如滄州磚河月堤潰決王朝恩囑令該州

那動庫銀相幫墊築亦不奏聞希圖隱諱似此巧詐居心苟且從事有忝職守深負朕恩王朝恩著革職仍留該地方所有今年應賠工程銀兩悉於王朝恩名下追出還項儻仍復推諉怠緩即行嚴叅從重治罪其直隸河道總督員缺著顧琮補授徐湛恩身為副總河不能協助辦理甚屬怠忽著革去副總河交與顧琮差遣委用稍有懈怠亦著嚴叅奏聞其副總河員缺著永定河道定柱補授永定河道員缺著內務府郎中巴什補授所有河道疎防官員

有應題叅者著顧琮查叅該部嚴察議奏

二十日奉

上諭據署陝督劉於義等奏稱吐魯番等處回民已移至安西男婦大小實共八千一十三名口等語從前回民自吐魯番移至塔爾納沁據署大將軍查郎阿等奏報共九千二百七十三名口今其中既有病故例應扣除口糧但伊等甫到安西寧可使之日用寬裕其供支口糧著署督劉於義等仍照原數支給暫不必扣除

以示朕格外之恩至額敏和卓本身及伊親丁著照官員例支給粳米以示優異又聞回民喜食白麵其每月口糧著支給白麵二十四日粟米炒麵各三日

二十五日奉

上諭朕聞直省督撫藩臬衙門俱有本房稿房掌案書辦一切官弁陞降刑名錢穀之事皆伊等查例呈稿繕寫承發督撫藩臬不過從中斟酌究不能出其範圍雖有幕客亦多依樣葫蘆照稿簽行以致伊等把持操縱擅

作威福暗通信息撞騙招搖是督撫藩臬之權轉屬若輩之手此種流弊直省皆然惟湖南更甚近來督撫藩臬衙門書吏雖經一體關防封鎖不容出入而日用供給仍係伊等自備每於取送出入之時密書細字巧通關節復將親信之子弟戚友賃房居住名為買備食物實則招攬傳遞遇有緊要事件即為牽引說合有挽工繹手諸名色往往事未入則已有照應事未出則已有聲聞屬吏藉以鑽營伊等飽其谿壑弊竇昭彰肆行姦

詭該督撫藩臬等每墮其術中而不覺在督撫藩臬等受國家重寄未有明知故縱之理但相沿日久習焉不知遂易為伊等之所朦蔽所當留心體察因地制宜防範周詳稽查嚴密務使弊絕風清始於地方有益若云書吏供給一節每年計費無多朕於督撫藩臬皆厚給以養廉即捐此些微以贍書吏使杜弊端似亦事之可行者但重用書吏不過藉其諳練成例若果得老成明白之幕客諸事嫻熟可資商酌不使書吏得操其權自

無可作之弊是又督撫藩臬等所當各自加意者也至於書吏積弊朕已深知但念伊等素習科條兼曉文義非真頑愚蠢者可比不過狃於積習恃其聰明希獲蠅頭罔計後患若督撫藩臬等動之以情理惕之以利害指其既往之愆予以自新之路在今日之勤慎小心固可享安寧之福即異日之役滿考用亦可邀上進之階伊等自知舞弊必累身家畏法奉公自收厚報諒未有不革面革心改途易轍者著督撫藩臬等將朕諭



旨徧行訓飭嚴切提撕倘自此以後仍復怙惡不悛或  
遇本官庸愚為其障蔽經朕訪聞定行查拿於各該處  
即行正法決不姑貸

三十日工部議覆巡視臺灣御史覺羅栢修奏臺灣  
戰船仍歸內地修造應如所請奉

上諭依議臺灣修造戰船因匠役糾夥深入番社採取木  
植易生事端今移至內地成造亦息事寧人之道朕思  
番社產木既多若令番民自行採運赴官售賣按數給

與價值使之獲利又無騷擾伊自樂從但不預先妥議規條難以期其必得又恐通事人等從中作姦致滋弊竇目前且向內地修造其番人自行售賣之說果否可行並如何辦理方為妥協著該督撫悉心定議具奏到日再降諭旨

世宗憲皇帝上諭內閣卷一百三十四

欽定四庫全書

世宗憲皇帝上諭內閣卷一百三十五

雍正十一年九月

上諭六道

初五日奉

上諭向來倉場事務廢弛已極乃朕所親見者經理之初難於整頓是以經九卿會議將殫心供職辦事才能之滿漢監督定為三年任滿即陞之例以示鼓勵十年以

來經朕留心整理又復時時降旨訓飭各官屏除弊端  
堅修厰座稽查盜竊禁止侵漁其有益於倉場者悉令  
舉行今倉務漸次清釐無復從前之陋習嗣後之為監  
督者但能謹守成規便可稱職亦不似從前之難於辦  
理矣若仍照三年任滿即陞之例似覺太優著大學士  
九卿會同倉場總督酌量定議具奏

二十日奉

上諭據山西巡撫石麟奏稱太原府知府劉崇元詳稱崇

元係正紅旗李永安佐領下人本年二月內送親姪回旗到京時李永安親至崇元家數次百般需索要去銀一百二十兩又陸續要去馬匹衣服等物今復差人到太原府投書一封索助銀三二百兩又開單索取驛頭氈片潞綢等物理合據實首報等語向來旗員之為外吏者每受該旗都統參領等官之挾制苛求及族黨親戚之需索無厭以致不能固其所守虧空國帑剝取民膏弊端甚多大有關於民生吏治是以屢經降旨嚴行

禁約數年以來旗員漸知斂跡不意李永安仍敢藐視  
功令向本佐領之外任官員橫索財物甚屬可惡著交  
與該旗大臣嚴行查奏石麟據實糾參不肯代為隱匿  
甚屬可嘉著交部議叙

二十二日

諭大學士九卿等爾等既為大臣須務其大者遠者如國  
家之水旱生民之凍餒一夫不獲其所即係朕與諸大  
臣之責至犯法論死本由其人自取原不必過為寬縱

或謂刑官開釋罪人可以積陰德於子孫此大不然如果秉公據法使刑皆當罪則慶流子孫此理之可必者如將殘忍凶惡之人屈法姑容欲邀一己之福而令死者含冤於地下不但不能致福且足以召殃有罪之人法所難貸爾等原不得任意從寬也夫寬且不可任意而況於嚴乎朕處事惟以至公無私只據案件而論其事之是非初不先存一毫意見至於平日不能化導使不犯罪朕與諸臣方且抱愧斷無以不殺人為刑措之

理此理朕見之最真最切特與爾諸大臣言之

二十四日

諭刑部諸臣所進招冊俱係細加斟酌擬定情實但此等  
罪人內有一線可生之機爾等亦當陳奏在前日擬定  
情實自是執法在此刻勾到高酌倘有可寬之處又當  
原情二者原不相背斷不可因已定情實欲符前奏難  
於更改遂隱默不復再奏也執法原情總歸於大公至  
當而已



又

諭大學士九卿等朕閱法司招冊得寬一犯便心意順適  
若不能寬便覺不快諸臣自同此心即質之天下之人  
自亦同此心斷未有以多殺一犯為快者但犯人情罪  
必實有可寬之處而後予以矜全此心順適方出於自  
然若犯人情罪實無可宥勉強求一時之順適屈法從  
寬致令惡人無所儆懼恣肆妄行則罹於法網者必多  
皆此姑息之一念貽之害也辟以止辟欲求斯民之遷

善遠罪正不得暫圖一時之順適耳語曰願天多生好人願人常行好事朕於此實有厚望焉

又禮部議覆福建學政楊炳條奏鄉會試論題專出孝經題目無多請與性理間出奉

上諭朕前降旨令鄉會二場論題專用孝經者誠以孝為百行之原孝經一書言簡而意深學者當時時覽誦悉心研究以為明倫敷教之本至於性理一書乃裒集宋代諸儒論說不能有醇而無疵其精微義蘊則皆原本

於論語學庸非別有所發明也朕令天下學士大夫留  
心理學蓋欲其實體聖賢之德性非徒記誦宋儒之文  
辭今若以聖人之孝經與宋儒之性理相並出題於義  
未協著仍照舊例行

世宗憲皇帝上諭內閣卷一百三十五

欽定四庫全書

世宗憲皇帝上諭內閣卷一百三十六

雍正十一年十月

上諭十二道

初三日奉

上諭朕賜祭賢良祠大學士張英於本籍著安徽巡撫徐本前往致祭大學士張廷玉請假回里著給與驛遞夫馬其所過地方派撥弁兵護送並文武官員迎接之處

悉照上年大學士鄂爾泰進京之例至明年回京之日亦照此遵行

初四日

諭大學士等朕見今年各省秋審人犯有不應緩決之案經九卿改為情實者甚多於情罪甚為允協督撫為通省大僚臬司為刑名總匯錄囚定獄何等重大之事豈可一味因循苟且如各省督撫臬司執法科罪而九卿詳情平反或九卿據法定議而朕酌奪從寬如此方合

政體豈有執法之官而得於法外任意徇縱者乎督撫  
既如此定議若九卿不行改正則朕亦無如之何將殺  
人者不死而國法不伸刑罰不中矣今九卿雖然改正  
然不將至當不易之理明白曉諭督撫臬司中識見鄙  
陋者將謂九卿定議務從苛刻稍存迎合之意遂於可  
矜可緩之案槩以情實奏讞其流弊尤不可言俟勾到  
事畢爾等將改正各案逐一查明朕另降諭旨通行申  
飭俾各省督撫臬司嗣後悉心定擬庶於政體允合稱

朕祥刑欽恤之至意

初六日奉

上諭各省商牙雜稅固有關國課亦所以便民是以各省額設牙帖俱由藩司衙門頒發不許州縣濫給所以防增添之弊不使遺累於商民也近聞各省牙帖歲有增添即如各集場中有雜貨小販向來無藉牙行者今槩給牙帖而市井奸牙遂恃此把持抽分利息是集場多一牙戶商民即多一苦累况牙帖納稅每歲無多徒滋



煩擾甚非平價通商之本意著直省督撫飭令各該藩  
司因地制宜著為定額報部存案不許有司任意增添  
嗣後止將額內各牙退帖頂補之處查明換給新帖再  
有新開集場應設牙行者酌定名數給發亦報部存案  
如此則貿易小民可永除牙戶苛索之弊矣

又奉

上諭硝磺為軍器火藥之用例禁甚嚴聞河南地方有出  
產焰硝之處往往小販經紀在該處以雜項貨物零星

易換赴隣省售賣現據湖北各屬盤獲究其由來不曰  
羅山縣即曰信陽州兼有供稱自河南各處地方換來  
不知州縣名目者朕思河南之硝既私行於楚北則其  
私行於附近各省更不待言此皆向來地方官未曾實  
力查禁之故著河東總督王士俊飭令各屬稽查嚴禁  
不得仍蹈前轍

又大學士等以緩決人犯馬四超一案請

旨奉

上諭馬四超著予勾盜犯越獄傷人兇惡已極而巡撫擬以  
緩決殊為失當朕前日所降諭旨言為大臣必須務其大  
者如良善之民至於凍餒老者不得遂其養幼孤不得遂  
其長此是何等可憐可憫說至此處真可垂淚是朕之責  
亦即諸大臣之責比之活一兇殘之人孰重孰輕孰是孰非  
事理顯然無可疑惑今人多被識見蒙蔽每謂寬宥一人  
可以積德蔭及子孫此天道之必無者朕非好殺亦豈好  
嚴若寬縱此等以為仁厚便非公正之道朕此心只有一

公字但未能從心所欲不踰矩惟思勉強行之耳十一年以來朕之本心朕之行事大臣等所共知共見爾諸大臣能以朕之心辦理天下國家之事朕實嘉賴焉

初七日奉

上諭凡因姦致死本婦者向來律無正條俱引因姦威逼人致死之例擬斬監候秋後處決但其間情事不同如係強姦既成本婦羞忿自盡者擬以斬候固屬恰當若強姦不遂將本婦立時殺死如此淫兇之犯實與光

棍無異非立斬不足以蔽其辜至於強姦未成或但經調戲本婦即羞忿自盡者非引照擬抵固無以慰貞魂而一例擬斬監候又覺未為平允似應擬絞監候至秋審時將監候人犯俱以情實請旨庶為輕重得宜朕意如此著大學士九卿會同詳議具奏

初十日奉

上諭聞山東武城縣地方夏間被水運河衝開一口灌入民田城牆衝倒七十餘丈現今積水未消商賈遠道二

麥不能耕種該知縣王殿顯居官玩愒毫不經心而該撫岳濬布政使鄭禪寶身為大吏於屬員賢否既漫無覺察於民生休戚亦並不闕切如從前高密縣知縣蔣之蘭等種種貪劣岳濬竟置若罔聞直至總督王士俊察出叅奏始列名題叅今武城縣知縣王殿顯漠視民瘼溺職已甚岳濬等又並不叅處是伊等於地方事務直視如秦越矣縱人言不及其何以自安著嚴行申飭其武城縣被水地方著岳濬速委幹員前往確查即行酌量

料理務令小民不致失所至被衝城垣應作何修理運河兩岸應作何堵築以防河水泛溢之處著該督撫會同總河朱藻等妥議具奏

又理藩院奉

上諭聞今年科爾沁等扎薩克旗分所種之穀被霜收成甚薄此等旗分連年歉收伊屬下人等或有度日艱難者亦未可定爾等查明當如何賑濟養贍之處即預行辦理

十四日奉

上諭浙江杭嘉湖三府上年偶被水災兼以飛蝗傷稼朕特沛恩施將應完漕米分年帶徵發帑賑恤黎民已不致失所惟是本地所產米石不敷本地食用現今年歲雖獲豐收而上年借糶倉穀恐一時未能買補足數明歲青黃不接時尚須米石酌撥平糶以濟民食不可不預為籌備著將杭嘉二府屬本年額征漕米各截留五萬石存貯備用再湖州府之歸安烏程二縣聞今歲收



成稍款所產米糧尤應留為本地之用著將兩縣本年分應徵漕米一十八萬餘石竝帶徵雍正十年分漕米七千六百餘石一併照部定折價改徵銀兩解部著該督程元章嚴飭地方官實力奉行毋得縱令書役人等額外需索以仰副朕加惠黎民之至意

十九日奉

上諭從來明刑所以弼教除暴所以安良何恩何怨何寬何嚴處之無心並非二事但準乎天理善亦不為慈能

協乎人情殺亦不為忍朕臨馭萬方日夕乾惕念不能  
一道同風俾吾民各安生理免於刑戮每以自咎所望  
內外諸大臣務識大體持正秉公存刑期無刑之心執  
辟以止辟之法先使民不敢犯俾無漏網之姦兇繼則  
導人不為漸化嚮風之頑懦如此設施尚待年月雖不  
敢遽望刑措或庶幾可移習俗應知刑即是教怨即是  
恩蓋稂莠不鋤則嘉禾不植義刑義殺正所以仁育仁  
懷自古至今固莫之能易者朕十年以來於一切刑獄

莫不虛衷歛息詳慎推研凡情有可原者務從緩減而  
意非主寬凡法無可貸者便依斬絞而意非主嚴本無  
成見惟其自取朕每接見廷臣並訓諭督撫大吏亦諄  
切講求反復開示諒已悉朕心喻朕旨矣今者秋審大  
典詳覽直省各冊如雲南絞犯中懷逼索陸起雲銀兩  
連毆斃命絞犯薩得搜殺遺孤並將匿孤之阿竒連截  
致斃貴州斬犯阿半爭產糾殺致斃三命絞犯喜生與  
簡尚志爭奪林坎將養媳連毆斃命誣賴打死絞犯王

景刀砍族兄復將伊妻砍斃誣賴強姦致死絞犯宇枯  
踞住宇奈家強佔沙出磨為妻復持標將阿舖截死四  
川絞犯朱成林率眾扛搶楊小妹至家強逼成姦且持  
刀拒捕砍毆楊載坤夫婦多傷斬犯熊二蓄意圖姦致  
傷人命廣西絞犯權特羅挾讐將藍鳴鳳殺死廣東斬  
犯岑達誣枉吳亞士為盜主使毆斃復又栽賊誣陷絞  
犯黃文翔窩盜分贓反捉人拷打勒贖並毀人墳擅封  
民舖福建斬犯張苞行竊拒捕傷斃事主斬犯李三放

火焚寮將周維揚燒死絞犯鍾廣周調戲蔡氏連戳鍾  
廷堅斃命絞犯翁德誣賴楊來拒捕毒打致斃又勒索  
差禮逼楊來之父楊高將女孫賣銀收受絞犯蕭宜念  
誣指蔡伯成為賊復主令緝打斃命湖北絞犯杜錫三  
將張文習勒死圖賴復將伊妻劉氏毒死湖南絞犯陳  
儒勝致死宗佐坤復剝取衣服棄屍水中絞犯嚴惠之  
商賈趙任康妻子將趙任康推落水中殞命陝西絞犯  
劉世銀勒死伊妻背往劉世顯家希圖抵賴斬犯扎的

身為番目聚眾殺死番民六命江西絞犯張遜騫挾嫌  
誣指王子才為賊致斃二命絞犯賴半斤面將蕭矮孜  
強行鷄姦不從刀砍斃命絞犯陳正典因圖親媾胡氏  
產業將胡氏拴縛強嫁胡氏誓不成婚投繯殞命浙江  
絞犯詹玉書懷忿主使毆斃何品成江南斬犯慧明與  
王氏通姦懷妬毆斃東岩絞犯費叙截死姪女主使費  
賢誣控張品斬犯李國輔假冒職官詐傳旨意斬犯黃  
望有心致死黃永壽持棍連擊斃命絞犯張珍將陳大

誣拷索詐致逼縊死絞犯馬成捏贓誣良致斃張二河  
南斬犯李三行竊拒捕復行越獄山東絞犯董超將梁  
韶非刑綁打以致斃命絞犯周宗璜捏指族嫂趙氏有  
姦繩縛攢毆殞命絞犯王在因張王氏責伊妹姦情遂  
將張王氏連毆斃命絞犯公英因圖姦張氏不從立時  
致死斬犯馬四超勒斃禁卒越獄潛逃山西絞犯王順  
將幼女石二姐兒拉抱回家持刀恐嚇強姦以上諸犯  
皆窮兇極惡殘毒姦淫法無可貸情無可原而各該督

撫擬擬緩決並無勘語且有上次定情實而今年又自改緩決者有監候年久之犯而每年秋審忽擬情實忽擬緩決者有本定緩決因部改情實即照擬情實本定情實因部改緩決即照擬緩決者業經九卿法司覆加詳核逐一改定試問該督撫等讞獄錄囚何等重大事豈竟漫不經心耶抑竟毫無定見耶或又以為殺一犯不如活一犯現殺一犯不如遲殺一犯以此為養德以

此為造福則尤淺之甚者也夫封疆大吏為民大父母



利濟安全實有攸賴一夫失所當引為已愆一政未平當引為已恥水旱災祲以及盜竊癡頑皆當引為已責無可推卸朕實存此心執此行以望諸臣工匠佐承宣俾德意廣敷萬姓蒙福至於殺人者死國有常刑儻殺人者不死則寃死者何伸况不殺殺人者將殺人者益衆誰使殺之已且為罪首縱不思明罰勅法憲典無私即據報應之成言循環之天理亦寧不大可畏乎朕嘗謂疎縱之過甚於苛刻姑息之愛等於殘忍但本公誠

卷一 三十一  
卷一 三十六  
之至意達仁義之通權此理大同日久自見拘迂淺陋者特未之省耳茲特就刑法一事明白剖示內外諸大臣見朕此旨若以為欲嚴是負朕恩若以為欲寬亦辜朕訓務籌遠大不任法亦不弛刑由此類推庶政皆然其各深體而勤求之毋忽

二十二日奉

上諭據侍郎那顏泰回京奏稱鄂爾多斯之扎薩克等深悔伊等上年疎忽之咎不勝愧懼且感朕寬宥之恩皆

甌勉以贖前愆此次料理添派兵丁起身及採買軍需駝馬等事俱竭力辦理內有原任貝子降為公爵之齊旺班珠爾羅卜藏於採買馬匹牲畜尤為急公効力等語鄂爾多斯之扎薩克等自知前愆於此次派兵及採買馬匹牲畜等事竭力辦理甚屬可嘉除貝勒諾羅卜扎木蘇已經加恩將伊貝勒之職從寬仍留外其次効力勤勞之齊旺班珠爾羅卜藏著加恩獎勵照舊賞與貝子之職貝勒扎木揚領兵前行走若好者大

將軍平郡王奏聞從前貝子那母扎爾色楞旗分派往  
兵丁內並無逃走駁回之人此次辦理馬匹牲畜又甚  
屬効力著加恩賞給緞十疋銀三百兩

二十五日奉

上諭督撫提鎮為封疆大吏總理軍務糧儲刑名錢穀營  
伍汛防等事責任綦重關係匪輕是以簡命之初頒給  
坐名勅書將所管轄地方所節制官員並應行事宜備  
細開載令其詳酌施行而督撫提鎮等於奉到之日即

騰黃刊刻通行所屬各為遵守此定例也但國家承平  
百年因革損益備極周詳各省州縣衛所有原隸該省  
後經改隸隣省者有隣省所屬原聽本省兼轄今已無  
須兼理者有文武官弁原係本職後經另改職銜者有  
地方改設已久員缺裁汰多年者而勅書所載仍祇照  
舊式繕騰並未另行改定是竟視為具文矣其何所遵  
守嗣後頒給勅書該衙門務將督撫提鎮等現在管轄  
之地方節制之官弁與任內一切應行事宜逐細查明

詳確開載俾節制經理釐然可據庶不失慎重封疆以  
昭職守之至意

世宗憲皇帝上諭內閣卷一百三十六

欽定四庫全書

世宗憲皇帝上諭內閣卷一百三十七

雍正十一年十一月

上諭十道

十五日奉

上諭大學士嵇曾筠敬慎居心忠勤襄事自簡任河道總督以來整理有方調度合宜即今年直隸豫省隄工均有潰決而江南地處下游不但各工平穩且有自開

引河之瑞此實嵇曾筠殫力宣勞之所感召且江南河  
務今年工程較多所用物料加倍而所費錢糧轉較從  
前減省茲又奏請將葦蕩營每年出產柴束立定章程  
償運交工濟用具見實心實力鉅細不遺朕念伊父之  
忠義伊母之節操雖已贈卹旌褒尚未膺一品封典今  
特沛殊恩著給與大學士應得誥封以示優眷

十六日奉

上諭鼓鑄錢文專為便民利用銅重則滋銷燬本輕則多



私鑄原宜隨時更定籌畫變通斯可以平錢價而杜諸  
弊順治元年每文鑄重一錢二年改鑄一錢二分十四  
年加至一錢四分康熙二十三年因銷燬弊多仍改重  
一錢嗣因私鑄競起於四十一年又仍復一錢四分之  
制迨後銅價逐漸加增以致工本愈重今寶泉寶源二  
局額鑄錢文每串需工本銀一兩四錢零歲計虧折銀  
約三十萬兩朕思錢重銅多徒滋銷燬且姦民不須重  
本便可隨時鎔化跣緝殊難非若私鑄必須有力之人

兼設有爐座器具易於查拿也若照順治二年之例每  
文鑄重一錢二分在銷燬者無利而私鑄者亦難似屬  
權衡得中可以行之久遠再現今五省採辦洋銅三省  
採辦滇銅朕思與其令三省辦銅解部莫若即令滇省就  
近鑄錢將鑄成錢文就近運至四川之永寧縣由水路  
運赴漢口搭附漕船解京可省京鑄之半似多便益至  
於戶工兩局需用鉛斤每斤部價七分有餘聞貴州鉛廠甚  
旺歲出四五百萬斤每百斤廠價一兩五錢如酌給水

脚令該撫選委幹員如數解交京局似較之高辦節省  
尤多再黃銅既禁用紅銅者自多其實黃銅即係紅銅  
白鉛攪和鎔成若不併禁仍於鼓鑄未便所有紅銅器  
皿應如何分別飭禁雲南開鑄貴州解鉛應如何酌定  
規條并現鑄錢文應否改重一錢二分之處著九卿詳  
悉妥酌定議具奏毋得輕率亦毋得拘泥

十八日奉

上諭松潘口外各番野性未馴時聞竊奪是以降旨令母

歲於適中之地宣諭化導俾共知法紀庶漸革愚頑夫  
惟誠惟信所以服人疑慮優柔固未有能馭衆者茲據  
郎中鼎滿岱總兵官邱名揚奏稱自上年化導之後十  
二部落番人並無為非等事惟占架擦戎亞二名係有  
名慣賊拿到研訊贓款明確因各將伊子為質求賞生  
路臣等因事在未經化導之前將二犯釋放將占架之  
子酸太擦戎亞之子松布交營收管俟二犯悛改之日  
再給領團聚等語占架擦戎亞如果係慣賊料不能悛

改即以子為質亦不可姑寬以貽番民害既已原情釋放後若有犯再擒治無難又何必留伊子在營以為牽制計鼎滿岱邱名揚如此料理識見殊屬鄙陋著奉旨到日即將酸太松布釋放令二犯各領回巢若能悔過即是良民毋得記伊舊惡倘復為非實乃醜類立應置諸嚴刑將朕此旨并諭各番目人等知之

又奉

上諭從前陝西疏濬渠工湖廣修理堤岸經該督等奏請

動用存公銀兩朕因關係地方民生事件降旨令動正項錢糧辦理今修理山東運河工程需銀五萬九千餘兩該部議照該督所請准動司庫正項朕思年來大兵在外需費浩繁而東省存公銀兩甚多可以通融辦理著將運河工程所需銀兩暫在東省存公項下動支應用俟軍務告竣之後仍將正項照數抵補

十九日奉

上諭武場鄉會兩試原期選俊儲材所以人材壯健技勇

兼優者外場考試另編好字號並分別雙單令入內場  
再考試文藝比校取中以杜冒濫倖進諸弊本年會試  
有頂替入場作弊者當經查出交部治罪又有武舉劉  
元方等人材技勇皆屬平常而考試大臣濫列好字號  
入場取中經王大臣等查出叅奏已降旨不准中式並  
將原考試大臣交部察議俾各知儆戒至於各省學臣  
考試聞有弓馬平庸文理粗通之人混入內場越號換  
卷傳遞代筆希圖取利以致好字號之武童自知文理

平常多有賄囑倩代者揆厥所由總因府州縣考試時每以廣收博取市寬大之名無論騎射優劣悉行錄送遂令技藝不堪漢仗猥瑣之輩混入內場種種作弊若不定以處分豈肯加意甄別嗣後府州縣官考試武童倘不悉心校閱仍蹈前轍濫行錄送著該學臣於校射時查出題叅交部議處其該學臣校閱外場尤當會同監射之武員加意選擇若將平常懦弱之人濫列好字號入場取中亦著提調官詳報督撫查叅如此則各顧



考成自必詳慎去取庶武場之夙弊可除將鄉會之人材日盛矣

二十一日正藍旗漢軍都統公慶復奏八旗世職絕嗣人員應分別承襲奉

上諭朕加恩絕嗣人員為之立後賞給世職令其承襲皆念伊等勲勞不忍聽其血食斷絕據爾等奏稱墳墓有在盛京者其承襲世職之人在京當差相距道途遙遠前往祭奠實有不便可詢問伊等如情願往盛京居住

即令移住盛京隨彼處當差所議無庸承襲之額森侯  
痕滿金索羅岱皆曾効力戎行懋著勞績額森侯痕現  
有墳墓在盛京滿金索羅岱雖不知墳墓所在亦可立  
墳祭奠著一體加恩賞給世職令其承襲

二十二日奉

上諭年來江南河工因總河諸臣經畫有方調度得宜是  
以湖河奠定民慶安瀾但河防關係重大將來河務必  
得通曉熟練之人遵循分理斯克繼前功而全河形勢

非平日講求親身閱歷必不能習有成算洞曉機宜即  
修防堵築以及估工查料等事非經練熟諳備悉利弊  
亦必不能隨時損益有裨工程是通曉河務之員不可  
不預為儲備也著每年在各部院揀選賢能勤慎司官  
二員帶領引見派往南河學習河務聽大學士嵇曾筠  
指示訓導其估工查料等事的委辦理以二年為期出  
具考語咨回本任如有操守才具實堪任用者即行保  
奏留工酌量題補其不堪學習者不必拘定二年於試

用數月後即咨回原任另行派員前往學習如此數年  
後學習之人既多則通曉熟練者自不乏員似於河防  
工務大有裨益

二十四日奉

上諭從來將備之選務須精悍之材雖目不識丁而膽畧  
非關文采縱貌不出衆而義勇無礙粗疎蓋整肅部伍  
委寄干城矢奔走於疆場甘勤勞於行列類非薄具聰  
明小有才幹者之所能為而勁健渾樸氣盛力充之裨

弁所當畧短取長加意造就以儲將材以重武備者也  
近見各省督提等保題引見之大小弁員除軍功勞績  
外大率以明白勤敏才堪辦事註考朕親加簡閱並逐  
一詢問奏對給便者有之才具明晰者有之而人材雄  
偉技勇超軼者曾不數見豈明白勤敏即可為將才而  
才堪辦事即所為武備耶所見不遠錯誤殊多嗣後該  
督提等凡保題將弁務首重弓馬兼選漢仗全材難得  
實效須收如仍有以軟弱而謬稱熟諳以機巧而謬稱

通達濫行保題為自私自便計者是重違朕訓膜視封疆矣定將該督提等嚴加議處著交該部即遵諭通行

又奉

上諭旗員隨任子弟定例年至十八歲以上始令歸旗其  
在京之世襲官年至十歲以上者送義學讀書今西寧  
道楊應琚之子世襲拜他喇布勒哈番楊重毅現隨伊  
父任所年甫十歲未至歸旗年分該旗乃引在京世職  
入學讀書之例行令歸旗殊屬錯悞著交部察議至於

八旗有似此違例將隨任子弟未至年分行令歸旗者亦著該部行查一併交部察議

二十七日奉

上諭八旗兵丁學習清語最為緊要嗣後侍衛護軍等凡看守禁門值宿該班等處俱著清語總毋令漢語至於訓練營兵丁會集操演之處亦著令其清語如該管大臣官員不行教訓稽察仍有漢語者一經查出定將該管大臣官員一併治罪

世宗憲皇帝上諭內閣卷一百三十七



欽定四庫全書

世宗憲皇帝上諭內閣卷一百三十八

雍正十一年十二月

上諭十四道

初二日奉

上諭正藍旗蒙古都統等將居住古北口外蒙古達蘭圖等控訴伊等並非副都統巴雅爾圖等家人一案具奏夫巴雅爾圖等實為科爾沁貝勒之後裔台吉達蘭圖

等係彼家人是實昔在

皇考時伊等曾兩次控告俱經治罪拿交伊主因巴雅爾圖等不能管束致伊等不服歷年控訴及將伊等宣入訊問達蘭圖等仍堅執奏稱並非巴雅爾圖家人寧伏罪而死斷不為彼家人而生等語計伊等人口共數百餘今即將為首數人治罪將伊等拿交巴雅爾圖等伊等既已互訟成讐決不能相安於無事巴雅爾圖等不但不能管束抑且與彼無益因此照伊等所有人數將入

官之人賞給巴雅爾圖等將達蘭圖等另行區處已敕令該旗大臣會同內務府總管議奏此蓋欲伊等彼此有益斟酌合宜故爾辦理八旗似此等台吉屬下之人甚多儻有效法達蘭圖等妄生覬覦以圖傲倖混行控告者朕必從重治罪斷不姑恕將此徧諭八旗知之

初四日鑲紅旗漢軍都統董象緯奏革職知府張景偉屢次請託奉

上諭請託之端大有害於人心吏治董象緯此奏甚屬可

嘉著交部議叙其所叅張景偉等著交部嚴察議奏董象  
緯到任未久即有人屢行請託其各旗大臣處豈竟無  
請託之人總由該大臣等因循瞻顧縱使不受請託亦  
但知潔已置之不問並不叅處以致不肖之徒罔知懲  
戒若似董象緯之據實叅奏則人人知所做惕夤緣惡  
習或可望改除矣著該部通行曉諭八旗大臣知之

初七日奉

上諭進士舉人例應銓補知縣因其中有賦性迂拙不諳

吏治而人尚循謹文理明通者又定有准其改教之例所以重民社之任亦以慎司鐸之選並為伊等保全功名也乃年來候選各員有年老才庸不稱縣令而苦不自量謂猶能勝任者其意以為得一縣官已身榮幸即不能勝任仍可改補教職並無礙功名殊不思以必不能勝任之人一經銓選到任學習至一年半年之後再請改教則此一年半年之內地方事務不且廢弛乎况教官本非閒員責任綦重若將無用之人補用亦何資

訓迪嗣後著該部堂官於銓選時詳加甄別凡年老才庸之人即諭令改教若本人必欲銓選知縣及到任後不能勝任者著該督撫題叅送部引見不必題請改補教職若該督撫因無改教之例或又將不勝任之員因循姑容不行題叅經朕察出定行從重議處

又刑部將庚戌科本部學習進士帶領引

見奉

上諭此學習人員內爾等請將伊福納等五員以各部主

事歸班選用爾等之意謂伊等次於留本部之員是以令其歸班選用各部主事也既以各部主事歸班選用則遇有刑部員缺自必仍選刑部與留部有何分別且刑部將其次人員請選用別部別部又將其次人員請選用刑部等部輾轉更調成何銓法又滿洲進士乃係新進若無出衆之處不便揀留本部者請以別部主事選用必占年久筆帖式陞途亦屬不可刑部原議尚未妥協著會同吏部另行定議

初九日奉

上諭本年江南應徵漕米朕已降旨密飭該督撫等以半本半折徵收為接濟民食之用惟是漕糧既一半改折則漕船亦應一半停運定例漕船減歇之年該運丁給與一半月糧以為養贍今於上年業已緩截本年又復減歇其行裝等項俱經預備於將次出運之時旋復停運則所領一半月糧或不敷用未免艱苦著將本年應支月糧等項悉行賞給此賞給銀米乃朕格外特恩嗣



後不以為例

又奉

上諭嚴緝逃兵一事各官宜實力奉行朕前降諭旨若逃兵在本處藏匿而該管官不能查拿後經發覺者定行從重治罪並令軍營領兵大員於兵丁逃走時即遣人查拿若蒙古王扎薩克等有能拿獲者交部議叙屬下人拿獲者重加賞賚從前所降諭旨甚為明晰年來逃兵甚多而各該處文武官弁並未陸續報有拿獲者是

皆不能實力奉行所致况逃兵不過仍回本處及左近  
地方藏匿若該管官果稽察嚴密何致任其潛留著再  
通行曉諭儻仍前怠玩不肯實力奉行一經發覺定行  
從重治罪

初十日正紅旗滿洲都統奏赫碩色等五家來歸情  
由無案可稽奉

上諭爾等查奏赫碩色等之祖另自來歸情由並無實據  
董鄂額駙何和禮帶來屬下人內查伊等祖父有無之

處亦云未得檔案俱係無憑據之事然董鄂佐領安得謂非原管佐領今若將伊等即作董鄂佐領屬下之人伊等焉敢不服但仍將伊等留此佐領下不惟彼此相處不安且不免互相控告今赫碩色等奏稱伊等祖父係另處之人並非董鄂處人朕將伊等另處之人分出另行奏編佐領之處詢問該佐領俱奏稱伊等感悅誠服爾等可將董鄂八個佐領內另處人數查明如及一佐領即奏編一佐領若及兩佐領即奏編兩佐領作為公中佐領其餘佐領

俱作董鄂原管佐領如此則可永絕爭競之端矣

十一日奉

上諭從前鄂彌達條奏臺灣地方僻處海中向無城池  
宜建築城垣礮臺以資保障經大學士等議覆令福建  
督撫妥議具奏今據郝玉麟等奏稱臺灣建城工費浩  
繁臣等再四思維或因地制宜先於現定城基之外  
買備茨竹栽植數層根深蟠結可資捍衛再於茨竹圍  
內建造城垣工作亦易興舉等語朕覽郝玉麟等所

奏不過慮其地濱大海土疏沙淤工費浩繁成功匪易  
故有茨竹藩籬之議殊不知城垣之設所以防外患如  
必當建城雖重費何惜而臺灣變亂率皆自内生非禦  
外寇比不但城可以不建且建城實有所不可也臺郡  
門戶曰鹿耳門與府治近號稱天險港容三舟傍皆巨  
石鋒稜如劔戟舟行失尺寸頃刻沉沒內設礮臺可恃  
以為固其法最善從前平定鄭克塽朱一貴皆乘風潮  
舟行入港水高港平衆艘奔赴無所阻礙大兵一入即

獲安平港之巨舟賊無去路而撫其府市人民南北路  
商賈一聞官軍至絡繹捆載而來相依以自保物力既  
充軍氣自倍賊進不能勝退無可守各鳥獸散終無所  
逃遁故旬日可以坐定向使賊衆有城可據收府治人  
民財物以自固大兵雖入攻之不拔坐守安平曠日相  
持克敵不易蓋重洋形勢與內地異此即明效大驗固  
未可更議建置也若謂臺灣築城即以禦臺灣外寇是  
又不然從前兩征臺灣皆先整兵泊舟於澎湖之南風

澳以候風潮風潮之便歲不過一時時不過數日若盜賊竊發或外番窺伺泊舟澎湖則夕至而朝捕之矣至南北二路可通之地雖多然如南路之燒港北路之八掌溪海翁港鹿仔港甲西二林三林中港竹塹蓬山惟小舟可入其巨港大舟可入者不過南路之打狗中港北路之上淡水其次則北路之笨港鹹水港去府治較遠縱有外寇亦不取道於此備設礮臺派撥汛兵朝夕巡視自足以資控禦今郝玉麟等請於現定城

基之外栽種茨竹藉為藩籬實因地制宜甚有裨益其淡水等處礮臺務須建造各屬並應增修不可惜費省工或至潦草應如何舉行之處著郝玉麟趙國麟妥協定議具奏

十三日奉

上諭從前敕令漢軍人等學習清語原祇令年少之人學習耳若年逾六十者概以不能清語之故該旗即不入於揀選之列則伊等効力年久之處豈不至於湮沒著



傳諭八旗漢軍都統等嗣後揀選人員年六十以上者不必責其定能清語

十四日管理正黃旗滿洲都統事務和碩莊親王允祿等帶領補授公中佐領等缺及承襲世職人員引見奉

上諭此內補授佐領之七十六承襲精奇尼哈番之白成承襲拜他拉布勒哈番之來住伊等俱甚年幼爾該旗大臣等務必加意照看成全造就遇大臣等陞轉時亦

必轉諭接任之大臣此朕特恩務令承襲世職之年幼子弟均沾實惠如大臣等不留心照看成全造就經朕查出必將該旗大臣等加倍治罪爾該旗將此註冊登記亦著當月旗登記仍徧諭八旗有似此等經朕諭令照看成全造就之世職年幼子弟俱著一體遵行

十七日協理山西道監察御史阿林條奏漕船停運之年所支給一半月糧請停其支給奉

上諭漕船停運之年該運丁等向來給與一半月糧以資

養贍蓋伊等全賴漕船出運將月糧等項贍養家口並可順帶貨物以取利益若遇停運則養贍無資所給一半月糧正不可少之經費也本年江南停運漕船朕尚軫念運丁艱苦於一半月糧之外將應支各項悉行賞給今阿林乃請將停運漕船之應支一半月糧停其支給甚屬卑鄙不堪着交部察議具奏

二十三日奉

上諭朕因浙省海塘關係緊要是以特命大臣前往會同

該督程元章等相度形勢定議興修又恐在工人員或  
怠緩稽遲不能及時建築特令將軍阿里衮副都統隆  
昇會同該督等督催辦理近聞堵塞尖山開挑引河已  
經該督等查勘數次尚欲再看再商但以行文閩省調  
取善水之人試探為辭議論紛紜終無定議全不思海  
水潮汐有時若遲至潮水長盛之時如何施工且採辦  
石料又互相推諉舍近求遠致稽時日該督等既不努  
力辦公而阿里衮隆昇亦俱袖手旁觀不上緊催辦若

各工內實有難以施工應奏聞請旨之事亦應及早奏聞何得半年以來尚無頭緒著傳諭程元章阿里衮隆昇張坦麟汪澂穆克登額等速將各項工程及時修築毋得仍前怠忽

二十六日奉

上諭雲南元江普洱兩府邊境上年猓夷蠢動百姓驚惶今雖地方寧帖年歲豐收但夫役頻繁之後恐小民輸將力有不逮所有元普兩府雍正十一年分額徵條銀

公件銀兩俱着加恩蠲免

二十七日奉

上諭直省州縣重囚輕犯例應分別監禁不許混雜一處其餘干連人犯即令取保候審不得濫行監禁定例昭然且朕屢降諭旨嚴飭奉行乃近聞州縣中有將一切斬絞流徒罪犯混雜監禁全無分別並將未經審結之笞杖輕罪與大案干連人犯一槩混行收禁獄官禁卒以流徒杖罪之人不至於死可無意外之虞干連人犯

指日省釋諒無脫逃之事因而任其親屬餽送探望又利其親屬出入之賄賂不為嚴禁此牽彼引借探視輕犯為由代重囚傳遞消息或重囚親屬閭中混入密送挖牆斷鎖行兇之具甚至以餽送飲食為名多送酒肉禁卒貪一時口腹醉臥不醒致命重犯越獄脫逃種種弊端總由輕重罪犯混雜監禁所致著各省督撫嚴飭府州縣等官務將重囚輕犯分別監禁不許混雜致滋弊端或間有州縣監獄房屋甚少不能分別者酌量另

造數間於監獄之外以收禁流徒等犯其杖罪以下及干連人犯仍遵照定例取保看守毋得濫禁如不肖州縣仍蹈前轍即行叅處務使實力奉行

世宗憲皇帝上諭內閣卷一百三十八



欽定四庫全書

世宗憲皇帝上諭內閣卷一百三十九

雍正十二年正月

上諭四道

初二日奉

上諭諸王大臣以元旦立春恰遇甲寅年丙寅月戊寅日  
甲寅時瑞雪繽紛竟日盈尺考之占書最爲吉祥豐年  
可慶爲朕稱賀朕素不言祥瑞降諭至再至三爾諸王

大臣聞之熟矣凡祥瑞者特其兆耳兆也者吉之先見尚屬未成之際全在乎人事贊成凡靈芝慶雲麟鳳嘉禾之屬皆

天心所以示喜豈得不以爲慶但須君臣益加修省以祇承天之休命果能事事上合

天心賜得一個是字則祥乃成其爲祥否則其事尚在未成何得遽爲稱慶洪範恭之對待曰狂如或因有嘉兆而不加修省遂侈然自肆則狂之咎徵特在轉移間耳祥

其可恃乎朕不敢妄自比擬但理以譬喻而得明譬如  
爾諸王大臣朕以其人可用許以加恩其人間朕恩旨  
便自放縱頓改前操朕亦惟有收回成命而加之以罪  
豈得更不轉移仍以恩待乎總之災祥之兆尚視人事  
如何以定休咎遇災而能知修省災必不成爲災遇祥  
而黽勉敬承祥必益成其祥儻遇災而不知修省其災  
固不待言遇祥而不知敬承其祥豈能必其爲祥也朕  
於天人感應之際知之甚明信之甚篤信之篤是以一

刻不敢自懈自逸知之明是以不憚反覆申明告誡爾  
諸王大臣詩云天維顯思無曰高高在上蓋面前虛空  
即是昊天足履撮土即是大地此面前虛空與日月星  
辰所麗之天無二無別此足履撮土與岳瀆山川所載  
之地無二無別皆屬天地一氣之內猶如人有七尺之  
軀人身拔一毫毛則通體皆知痛癢豈有人於天地之  
中舉一念行一事而天地不呼吸相通者乎作善降之  
百祥作不善降之百殃如影隨形如響應谷形谷既存

而以影響爲不可必之數豈不愚昧顛倒之甚夫善者公而已矣心乎天下國家之謂公心乎一身一家之謂私爲大臣者誠心乎天下國家之公而不計及一身一家之私天有不降之百祥者朕信其必無是理然則其一身一家之計正復得則兩得也苟心乎一身一家之私而不計及天下國家之公天有不降之百殃者朕亦信其必無是理然則其一身一家之計亦復失則兩失也朕雖深信此理朝乾夕惕不敢刻忘然天下國家之

事非朕一身所能獨理書曰天工人其代之朕不能不  
賴爾諸王大臣之克代天工則朕固不能已於諄諄訓  
誡也朕非推諉爾諸王大臣但朕所爲者朕之事諸王  
大臣須各盡爾諸王大臣之事人惟無志則不能自立  
而推諉他人如爲大臣者以天下國家之事爲己躬之  
事且以爲非我莫能爲而身任之而不辭斷不諉之他  
人一人如是人人如是則內外大小諸務有不事事合  
宜者乎如使內而八旗部院每事諉之參佐司屬參佐

司屬又諉之大臣外而督撫藩臬每事諉之府廳州縣  
府廳州縣又諉之督撫藩臬又或內則諉之於外外則  
諉之於內外交相推諉皆謂主上自有乾斷如此則  
朕何所恃以代天之工朕雖朝乾夕惕亦何由使事事  
合宜以仰邀

上天之嘉祥福應乎今歲元旦時雪既有其兆當益加奮勵  
朝夕修省以期成此瑞慶我君臣其共勉之

初四日奉

上諭苗疆地方緊要道廳缺出委署各員每以本管地方有刑名錢穀之責不能長駐於署印地方以致苗疆乏員彈壓事件耽延嗣後苗疆道廳缺出著該督撫於屬員內揀選才具勝任之員委令署理並令速赴駐劄彈壓其本任事件若可以照應仍令兼管如不能兼顧即著該督撫酌量遞行委員署理俟新任官到後再回本任如此庶各有責成無可推諉於苗疆地方大有裨益矣



二十三日

諭禮部琉球國十年進貢方物曾經降旨准作十二年正貢今該國王復行奏請仍遵舊典按期入貢情辭懇切具見悃誠著仍遵前旨行

二十七日奉

上諭朕因河防關係緊要特命大學士嵇曾筠在任守制管理總河事務今據嵇曾筠奏稱現將本年各項物料工程如何查核催償條析指明交高斌辦理臣於三月

內料理喪事畢即趨赴河工凡一應修守搶護機宜臣  
務必悉心籌畫查察各工儼辦妥協所有總河印務伏  
祈仍著高斌管理臣協同保固伏秋兩汛平安霜降之  
後籲懇俯准回籍終制等語河工事務嵇曾筠已經辦  
理妥協今於料理伊母喪事之後即赴河工指示機宜  
則一應工程自可保固平穩伊請將總河印務仍令高  
斌署理於霜降後回籍終制情詞懇切具見悃忱著照  
所請總河印務著高斌署理嵇曾筠於霜降後准其回

籍終制再稔曾筠本籍常州距淮安不遠明歲工程亦可就近往來協同經理在伊終制之心既已得遂而河防事務亦大有裨益矣

世宗憲皇帝上諭內閣卷一百三十九

欽定四庫全書

世宗憲皇帝上諭內閣卷一百四十

雍正十二年二月

上諭七道

初二日大學士兼管兵部尚書事鄂爾泰奏兵部堂司各官蒙混造冊冒銷驛站錢糧奉

上諭山東驛站奏銷各項雜用銀兩弊端百出從前兵部堂官何以不行查察此等情弊非只泛看題稿而能查

明者若不將歷年案卷逐細留心清查何能得明事之根原此案雖由兵部公同具奏實係大學士鄂爾泰一人查出辦理者如此實心任事方不愧爲朝廷大臣將此等留心政治爲搜求深刻可乎從來大姦大弊皆由小事積累而成若能不時留心查核遇有一毫情弊即行革除何至滋蔓爲害況釐姦剔弊全在平時今蒙

上天慈佑國家昇平正宜及時綢繆整理內外大臣應共相勉勵者據兵部如此則別部此等情弊亦所不免著將

此摺交與各部院堂官看閱若各部院俱能如此實心  
查察何弊不可清除大學士鄂爾泰著交部議叙范時  
繹喀爾吉善楊汝穀著交部察議普泰通智鄂善高起  
任事未久從寬免交部

又理藩院奉

上諭拉錫色楞之父貝勒達錫拉布坦身係盟主將辦理  
兵馬緊要事件怠忽遲悞理應照該衙門所議減等以  
公爵承襲但伊祖達爾扎於平定陝西花馬池定邊等

處之役甚屬効力而拉錫色楞復能知伊父之罪上年辦理馬匹事務竭力奮勉行走著加恩襲封固山貝子

初六日奉

上諭直省關稅監督於地方官原不相統轄一切呼應不靈各關大小口岸甚多監督一人勢難分身兼顧每選委書吏巡役公同親信家人稽查收放而地方文武各員以爲無與已事並不協力或轉懷挾私意則姦商之隱漏地棍之把持督撫或不關心監督動則掣肘不獨



於稅務無補即於地方亦難免擾累嗣後凡有監督各  
關著該督撫兼管所屬口岸飭令該地方文武各官不  
時巡查如有縱容滋擾情弊聽該督撫叅處至監督徵  
收稅課及一切應行事宜仍照舊例遵行不必聽督撫  
節制如此庶關稅既有專司而地方官仍無敢岐視於  
稅課商民似均有裨益

又奉

上諭聞江南通州濱海地方上年秋收稍歉現今米價昂

貴鹽場竈戶未免謀食維艱將來青黃不接之時尤不可不加賑卹通州地方原有鹽義倉穀石存貯可以動撥應用著署總河高斌即行酌撥數千石遴委實心任事之員分運各場設廠煮賑並再行酌量撥運平糶務嚴飭各員實力奉行勿任姦胥猾吏侵漁中飽至各場竈戶有現在應徵折價錢糧著一概暫緩至秋成之後再行徵收

十三日兵部恭奏正白旗滿洲都統查爾泰等繕寫

諭旨遺漏應分別議處奉

上諭查爾泰偏圖佛凝峨俱著銷去紀錄二次免其罰俸  
德福閣圖肯係協辦旗務之員俱不必罰俸嗣後協辦  
旗務各員於應管事件內有應行處分之案仍照例處  
分若旗務內有議處都統等案件不必將伊等一併議  
處

十九日大學士鄂爾泰等議覆浙江總督程元章奏  
中小壘引河難以開挖尖山難以堵塞應令再加詳

勘奉

上諭依議浙省海塘關係重大固須詳慎尤戒遲疑若總理者不肯擔承將分任者愈多瞻顧則因循草率迄無遠圖其何以謀奠安而垂永久該督程元章毫無確見今將海塘一應工程著副都統隆昇總理今御史偏武前往協辦所需文武工員俱聽隆昇揀調其運辦物料預備人夫及給發錢糧等項仍著程元章料理應付無得推諉並無得稽遲

二十二日奉

上諭向來南北總河奏稱桃汛伏汛秋汛等情形俱從驛遞馳送一日行八九百里朕思動用驛馬當酌量事之緩急以定遲速若河工有緊要奏聞之事自當星速馳遞至於汛水平穩乃照例奏報者每年河水情形朕皆於奏摺中先期聞知不待題本之至也嗣後南北兩河奏報汛水平穩本章著河臣酌量寬期毋得照前奔馳疲勞驛馬

世宗憲皇帝上諭內閣卷一百四十

欽定四庫全書

世宗憲皇帝上諭內閣卷一百四十一

雍正十二年三月

上諭十道

初一日奉

上諭范時繹乃一旗員朕念其爲勲臣之後逾格加恩用至內外顯要職任實冀其追思伊祖爲國家誠心宣力紹述家聲乃伊在江南任內居心詐僞辦事瞻徇吏治

官方毫無整飭鹽梟巨盜縱令遠颺且與姦究不法之徒私相往來曲爲袒護情弊敗露之後朕猶諒其愚昧而保全之復用爲北河總督予以自新之路乃當伏汛危險之時伊竟袖手旁觀將國計民生視同膜外比降諭旨切加懲儆幸而水勢漸退工程得保無虞朕知其不可外用撤回京師仍念范氏子孫現爲大員者甚少范時繹屢經獲罪之後定感朕三宥之大恩洗滌肺腸痛自奮勵以圖後效是以仍用爲工部尚書兼管兵部



事務乃伊玩愒性成將一切部務巧於推諉全無實心効力之處是朕屢加特恩而不知感伊屢獲重罪而不知愧誠可謂下愚不移者非尋常疎忽之咎可比范時繹著革退尚書職任以為負恩溺職者戒

又奉

上諭朕聞上年福建赴臺征勦番賊之兵丁所帶用火藥鉛子等項俱令各兵自備朕思兵丁遠涉重洋征勦出力隨帶用去之火藥鉛子等項應動支公項銀兩按數

造補不必令各兵自備可傳諭該督提知之

初九日戶部議覆長蘆鹽政鄂禮奏永平府屬鹽課  
一案奉

上諭前因商人晉同信欠帑無完是以招募徐季韓等代  
辦乃晉同信巧詐爲姦與徐季韓等通同作弊仍復暗  
佔引窩懸帑侵利續換新商何永盛承充而徐季韓等  
竟敢結黨把持抗不交割甚屬可惡國家之招商行鹽  
原爲辦理國課乃一種狡獪之徒往往以出資項充爲

名而詐偽營私弊端百出以致帑項稽延積成虧缺是招商辦課轉開侵帑虧課之門此等姦商與光棍無異司其事者不可不察此案著該鹽政會同總督李衛照部議嚴審究追如逾限不完著落濫委之運使彭家屏分賠仍將晉同信並徐季韓等從重治罪

十五日奉

上諭據署福州將軍準泰奏稱福州駐防旗兵蒙恩賞銀二萬兩營運生息以濟吉凶之用雍正八年間原任將

軍阿爾賽派員經理臣抵任以來循照舊例而行今計  
算除每年賞給兵丁及墊還退甲馬價外現存一萬兩  
有零臣伏讀原奉諭旨所賞帑本不必繳還但此項存  
剩息銀日積月累爲數漸多若存在營恐起侵那等弊  
應請咨送巡撫發交藩司另款貯庫俟將軍衙門遇有  
公用之處請旨動用等語朕所賞兵丁生息銀兩必得  
該管大臣經理得宜始可以使兵丁均霑國恩營伍永  
受利益若不論得息多少儘數開銷則利將滋弊轉以

累官究於旗營何補今覽準泰所奏具見阿爾賽與準泰先後在任實心辦理顯有成效可將此傳諭各省將軍知之

又吏部遵

旨帶領各部郎中引

見奉

上諭今日引見各部郎中其中多有年老昏憤者著傳諭各部堂官將滿漢郎中員外內有年老不能辦事之人

秉公甄別據實舉出該堂官帶領引見儻有徇情姑容者將來經朕察出該堂官不得辭其責

十七日署正白旗漢軍都統高起等將擬補佐領之驍騎校等帶領引

見奉

上諭佐領職任甚屬緊要向因大臣等兼管或致本旗大臣瞻徇掣肘是以降旨令於世職或對品或應陞官員內揀選補授並無永不著大臣等兼管之旨今該旗一

時不得應補之人即應將情由奏明仍著大臣等兼管  
何得將驍騎校等員越次擬補帶領引見不但伊等品  
級不相當且伊等並非超羣軼衆之材亦無出兵効力  
之處何所見而如此辦理甚屬錯誤著另行辦理具奏  
併將此旨傳諭八旗知之

又宗人府奏請承襲和碩康親王爵將應襲人員帶  
領引

見奉

上諭看來崇安之子永恩永憲年俱幼小從前康親王傑書王爵以傑書子椿泰承襲時因椿泰諸兄等係庶妃所生是以未准承襲今永恩永憲亦係崇安庶妃所生況王爵尤宜慎重務須斟酌人去得克守其業者方爲有益爾宗人府會同諸王詳議具奏再崇安之伯父及其伯父之諸子等亦著詢問

二十日奉

上諭據順天學政吳應棻奏稱前經摺奏八旗歲考不到



生員一事原爲清查規避起見誠恐不肖旗員借端苛索其中遂意者即現在京師亦混稱駐防隨任不遂意者即已經考過仍不放回原處仰懇敕下八旗都統轉飭各叅領佐領秉公稽查勿得借端需索高下其手以致苦累童生等語清查八旗歲考不到生員原以杜規避之弊然不肖旗員或借此生事苛索亦未可定著該都統轉飭叅領佐領等秉公辦理儻有徇情朦混及需索苦累等事該都統即行查叅

又奉

上諭朕因武弁中熟習水師之員甚爲難得每見督提諸臣有將熟習水師人員題補陸路者是以降旨令督提等留心酌量其不宜於水師之員則應調補陸路切不可因陸路一時需人而輕調熟練水師之員至於水師內目前看來雖屬平等之員漸令學習日久亦可熟練若一時俱行改調安有如許人員以供水師之用今覽鄂彌達本內題請改調水陸各員是伊錯會朕意可將

此傳諭鄂彌達知之

二十四日奉

上諭廣州將軍柏之蕃奏稱前蒙聖恩軫念漢軍駐防之  
餘丁日漸蕃衍准其充補將軍標下綠旗兵丁之缺如  
伊等父兄在旗遺有甲缺仍令掣回頂補今廣東駐防  
餘丁在綠旗食糧者已有三百餘名伊等久經學習標  
營事務如有標營外委缺出似可與綠旗兵丁一體考  
驗拔補若著有勤勞照標營一例拔用則伊等益加感

奮等語朕令駐防餘丁項補本將軍標下綠旗糧缺如  
伊等父兄遺有甲缺仍令掣回項補原爲加恩旗人餘  
丁俾得養贍之意若標營外委千把缺出俱令一例拔  
補日後即用爲營弁則旗兵別開捷徑各思分外得官  
懷僥倖之想而本業必至廢弛矣況駐防旗兵更要於  
綠旗此中如果係出格人材可以拔補者若不揀選用  
爲旗員而旗員又須另簡則兵丁中有如許可用之人  
材耶柏之蕃因其操守廉潔應用至於此任伊自到廣

以來日惟誦經習靜置訓練營伍於不問將蔡良整頓之條規漸漸廢棄且其素性專尚柔善沽名而又無沽名之才惟好爲此婦寺之仁今復建此悖謬之議以冀取悅於駐防之旗人可謂無能爲之至矣識見甚屬卑鄙著交部嚴察議奏以爲徇名妄奏者戒

世宗憲皇帝上諭內閣卷一百四十一